

## ***D'Weihnachtsgschicht***

Es is zu seller Zeit bassiert, als de Kaiser Augustus sei Bote hod ausschelle losse: All mei Leit im Reisch were jetzterd mol gezählt, damit ich weeiß, was an Steier neikummt! Des war damols wirklich zum erschde Mol un zwar als de Quirinius Statthalter vun Syrie war.

So sin die Leit halt losgange, um sisch in Steierlischde oitrage z'losse, jedes in sellem Ort, vun wu de Großvadder oder de Urgroßvadder her war. Aa de Josef vun Nazareth in Galiläa is losgange, no in des Bethlehem im jüdische Ländle un zwar desderwege do no, weil er aus de Sippschaft vum König David rausstamme dud. Also hod er sisch do oitrage losse müsse zsamme mit seiner Fraa, de Maria, die e Kind kriegt.

Grad als se dort ware, war's so weit, dass des Kind uff d'Welt kumme sodd. Un so hod d'Maria ihrn Bu kriegt, de erschde, hod en in Windle gwickelt un hod des Bobbele in e Fuuderkripp noiglegt. Warum grad do noi? Ha, es hod halt koi anneres Plätzle gewwe im Gaschdhaus.

Uff em oigezäunte Feld von seller Gegend ware Hirte. S'war Nacht, un sie hawwe uff ihre Viecher uffgepasst. Dann uff ä Mol war de Engel des Herrn bei ene. Glänzisch un hell war's um se rum, bei Gott! Mensch, sin die verschrogge. Awwer de Engel sächd zu ene:

„Dud eich ned förchde! Bassd mol gud uff! E ganz große Freud du ich eich verkündische, alle annere Leit were's aa noch erfahre. Wissd er, drin in de Stadt Davids, in Bethlehem, is grad ewe de Heiland gebore, Chrischdus, de Herr. Dodro kennt ihr's merke: Des Bobbele is in Windle gwiggelt un liegt in ner Fuuderkripp drin.“

Zu dem Engel sin dann glei druff noch mehr Engele vum Himmel kumme, schareweis. All zsamme hawwe se schee losglegt un Gott globt: „Unserm Herrgott in de Höh nix als Ehr un de Mensche uff de Erd nix als Fried, weil Gott se so arg lieb hod!“

Als d'Engele wieder weg ware, sage die Hirte: „Alla, geh mer noi in des Bethlehem! Die Sach, die do bassiert is, die wolle mer gnau wisse, wenn's schun de Herrgott selwer uns hod sage losse.“ Hordisch sin se marschirt un hawwe se gfunne, all zwee, d'Maria, de Josef – un des Bobbele in de Fuuderkripp noch dezu.

Als se alles gsehe hawwe, sage se sisch: „Mir müsse die Sach vun dem Bobbele glei weiterverzehle.“ Sie hawwe's ned for sisch bhalte kenne. Die Leit awwer, die des mitkriege, guggle ganz schee bleed wege dem, was die Hirte do alles rumverzehle.

D'Maria awwer, die hod all die Sache, die gschwätzt wore sin, for sisch bhalte un driwwer simeliert – die in ihrm Herz drin.

Die Hirte sin dann wieder hoim zu ihre Viecher. Un was hawwe se unnerwegs ned for e Gedöns gemacht, als se de Herrgott globt un gepriese hawwe. Es ware jo grad sie d'erschde, die wu des alles z'höre un z'sehe gkriegt hawwe.